

肖巖詩鈔

肖巖詩鈔卷五

涇上趙良霽肅徵甫著

涇川竹枝詞

百里涇溪勝若耶環溪紅白放春花桃源不遠人  
間世祇恐漁人誤泛槎

攜壺竹塢遍桃塢泛艇下坊沿上坊不爲看花尋  
古寺熙光樓畔祀朱王

獨掉輕舟出賞溪酒旗風裏綠楊低欲尋黃蘗唐  
朝寺大半亭臺烟雨迷

桃花潭接水西灘怪石驚湍灣又灣昨夜恰逢新

雨漲放船便下馬頭山

大觀亭子幕山頭倒影清溪九曲流  
酌酒獨懷唐刺史啼鳥落日古猷州

方池十畝抱櫺星池面橋通八角亭  
最是風來蘋約處承流橫卧一峯青

疎篁抽筍蕨萌芽上巳琴魚穀雨茶  
山裏人家風味古便應畱客飯胡麻

風爐水碓是生涯古北冲中紙可誇  
一種宣州新

色樣揀將上品進官家

寶勝寺前雙白塔南山橋畔一青松  
摩挲古色傳

唐宋飽聽僧寮日暮鐘

道士湖邊關小園湖光山色恰當門夜來聽雨窺  
鴻閣淚落蘇家老弟昆

閣爲先伯父環石公書屋命名窺鴻意在先大人也

### 遊大山

層巒勢合沓一峯忽孤騫  
亘若屏障列高與青冥  
延盤迴循仄徑登頓躋層巔  
飛鳥忽在下舉頭惟有天  
林端露怪石勢若於兔眠  
惜無飛將軍飲羽能摧堅  
拂薜聊小憩展眺窮大千  
北望琴高峯突兀小兒拳  
左顧西水寺塔影秋毫顛  
山城與板屋一氣浮荒烟  
意恰林下趣跡局區中緣  
哀彼羊叔

子揮涕沾林泉

汪珮聲招聚濯輝齋

故人新釀熟招我入山遊  
閣閉亂峯色門通清澗流  
看花忘主客話舊歎沉浮  
十載悲離索相逢盡白頭

入慈坑遇雨暮宿田家

杖策及朝暉薄暮未遑息  
途循兩崖入險自五丁  
闢歷深穿隊道陟高憑  
鳥羽蕩心走雷霆刺目森  
劍戟後坎甫幸脫前坡已  
驚覲谷暗希人踪林幽  
遺虎跡風迴暝色深  
巒挾雨氣積隔溪見田家微

燈漏簷隙圓蔬供客餐草榻永今夕夜深萬籟絕  
夢落山雲黑

簡胡康仲

時任青陽廣文

憶昔悲歌遊燕市黃金臺畔逢君始傾情倒意各  
盡歡擊鼓烹鮮何日止十年獻賦長楊宮歸來把  
耒誅蒿蓬汝向蓉城設絳帳一官不失儒家風莫  
嫌廣文飯不足享客春盤堆苜蓿莫嫌廣文官獨  
冷坐客空齋布氍毹詩翁善謔多失真學舍如舟  
難欠仲須知低頭誦經史要使滿座生芳春君家  
教授治經義弟子都能取高第教成便爲梁棟材

師嚴豈比風塵吏我今老矣無一能行將廢讀恣  
登臨裹糧無力夢猶鬱挂壁有杖龍先騰緬想池  
陽排九子芙蓉不墮秋水尋山便道過鱸堂挈  
酒煩君導遊履

九日古香齋用坡公韻寄師臣南田繩伯諸

姪

天公不依詩人說衆芳催并一時發

歐公詩衆芳勿使一時發

遂使名園紅白姿零落秋城風雨滑空山已隕吹  
香粟小池安得凌波襪剩有東籬菊數枝聊伴幽  
人杯一呷令節迫吹孟嘉帽閉門閒放劉伶鍤汝

南故事妄流傳日暮歸來雞犬殺卧病我已罷登  
高攬勝人誰尋古剎門前敗葉任飄零屋後青山  
從坎軋遙思諸子逸興飛恰逢桑落小槽壓吟成  
糕字笑徒豪醉倚唾壺敲欲齧應念空齋有病叟  
力不能飛如睡鴨若肯過我慰窮愁落日寒林開  
霽霽

九龍菴阻雨

天半九龍山山中老衲閒我來尋古寺風雨失烟  
鬟木杪饑鴉墮籬根敗菊斑何當開曉日絕頂試  
躋攀



寄王靖夫

昔年借榻小華山與爾相違咫尺間每到秋冬看  
落葉便隨杖履步烟鬟如今風雨悲離索令我川  
途夢往還醫國近工盧扁術刀圭乞與駐衰顏

讀史記偶書

史遷義法最精詳項羽何緣比始皇若爲當時求  
本紀沛公北面事懷王

亭長歸來事倖成屠沽刀筆共功名叔孫禮樂皆  
秦故莫爲新雄貶兩生

野梅

軟風吹夢出山城古道寒梅弄午晴乍有香來春  
澹沱更無人處月低橫不逢和靖誰偷眼獨記揚  
州亦少情清絕一枝殘雪裏何曾翠羽繞林鳴

大雪用坡公聚星堂雪詩韻

朔風吹空雲葉葉蒼公作勢欲飛雪前山後山望  
模糊米家潑墨叫奇絕須臾布成摩詰圖惜無屋  
角芭蕉折平原瀼潼行人稀盤空慘澹饑鷹滅今  
年春較去年遲

是歲閏三月

發榮未見驚電掣長嫌宿

凍作鱗皴豈有微和舒面纈扶杖出門苦泥濘散  
步下堦思木屑安得長天轉好風坐見冰花去如

簪布暖頻抽宿麥青占祥便作豐年說不然吾獨  
忍饑寒高卧何妨僵似鐵

閱日又雪仍用前韻

我欲遠駕舟一葉把竿獨釣寒江雪不則射虎南  
山遊一箭橫穿快殊絕奈何閉戶獨微吟手撚霜  
髭凍欲折昨朝大雪茅簷傾今晨擁絮炊烟滅入  
春一月不肯晴每欲出遊苦牽掣天公意豈怨春  
遲故遣寒冰作花纈屋後蒼松積瘦皴窗前綠竹  
鳴騷屑憐他色相未堅牢苦我年華去飄瞥命觴  
欲萃衆賓歡煮茗何慙黨姬說若逢清景勿畱連

此錯難鑄六州鐵

訪脉塘姪

久別應相憶尋春還獨來空堂少人跡積雨上莓  
苔回首湖邊閣論心花下杯脉塘舊設帳于湖上窺鴻閣吾儕  
多聚散歸路且遲徊

巧嶺山中忽來羣虎居人苦之釀錢會獵有  
衛翁者連斃其二雲起以書邀余往觀因  
寄以詩

巖關蜿蜒環羣峯枯槎敗葦成深叢白日欲落颯  
微風於兔引子爭來宮熊豕麋鹿食且窮饑腸忍

以人爲充野夫結伴還相攻火鎗毒矢兼勁弓剪  
除荆棘開蒙茸欲取虎子虎穴中歟然突出高凌  
空觀者股栗無人容吁嗟馮婦不復逢誰其攘臂  
角兩雄有善搏者衛老翁挺鎗舉火洞厥胸振林  
一吼衆耳聾灑血空山殘雪紅五日以內斃二蟲  
寢皮食肉春酒濃阿弟見獵心猶童作書招我扶  
枯筇我卧閉戶久疎慵豈能與衆攀龍從何況履  
尾啞人凶或傷厥元喪其躬

時有觀獵而  
爲虎所斃者 哀哀寡

婦號蒼穹天壤乃有使君封

次韻雲起凸泉歌

泉在長春菴後巖關絕頂廣深尺許山僧以竹筴引之余屢遊其地未之見也雲起獨溯其源名之曰凸泉而作歌以紀之

山中有清泉潄然而仰出一勺歷冬春永無罅與溢時能出雲見神怪偶遇回風自騰沸林端長作白鶴飛海眼不隨荒草沒天公欲供十方僧故向峯頭開乳窟其中窪如古硯凹四圍高比金樽凸山僧截竹引涓涓百丈香厨流泔泔何須抱甕行蹣跚自有花瓷互攜挈憶昔屢從山下過未探此山漿與埒旅當卽次榻可借師參玉版筍堪掘豈

知亭前掬水來有源直從烟霏日暗深處發我聞  
昔人品泉首中冷龍窟深沉誰引汲叶惠山虎邱  
名遠馳吁嗟此泉終古埋幽谷叶若逢德裕一來  
遊應教水遞踏盡巖關越吾家惠連頗好事夢想  
峯山流玉屑未能遠溯丹水奇且來近煮石泉潔  
記之以詩錫厥名白雲滿月何足說好攜茗椀從  
子遊一洗枯腸冰雪潑

丁溪道中

一峯未了一峯生扶杖亂峯堆裡行雲日每移昏  
旦侯松杉都挾雨風聲倦攀鳥道先愁遠險擬人

心轉覺平我欲結茅從野老巖間叱犢課春耕

望月菴

繩伯舊寄  
讀菴中

大山宮小山古寺萬山間有客此棲息讀書長閉  
關我來望春月誰與步孱顏搔首竹林下聽猿空  
自還

宋村道中

趲曉肩輿出天風吹夢醒兩崖森積鐵一水建高  
瓠虎跡蹊田得猿聲隔樹聽暮春花霧重巖谷畫  
冥冥

中流放櫂圖爲峽江蕭松浦題



丈夫功名馬上得腰弓髀梁馳殺賊誰能鼓枻從

漁父落日行吟楚江碧我生踪跡拘于墟神尻未

得周坤隅蕭郎示我西藏錄

松浦先將軍出鎮西藏作西藏見聞錄

坐令夢到狼居胥乃翁起家列霜戟崑崙月窟窮

西極公子翩翩趨過庭馬蹄踏遍蠻烟青短衣長

劍將家子食肉終當馳萬里奈何遽作逍搖遊峽

江一棹隨輕鷗應爲萍踪無定在朝遊蜀山暮粵

海天邊作客誰爲親畫裏江山長不改君不見漢

家超勇誠英雄父子俱收汗血功扁舟漫擬天隨

子一葉還乘破浪風

聞周碧山卒于揚州

周郎鐵筆漢西京一別邗江獨愴情  
眼看故交零落盡不知何事樂長生

遊遍天涯長短亭每憑歌笑慰飄零  
而今風雨雞臺下一覺揚州夢已醒

簡廷瑞

獨抱離憂未可刪雲邊矯首望南山  
濠梁與我偕莊惠蝸角從他鬪觸蠻  
花事不隨春月展時閏三月酒  
杯須遣客心閒遲君一日消千載  
莫學枯禪靜閉

關

過水西

西水唐朝寺曾經李杜遊我來千載下惟見一溪  
流清磬出花塢夕陽明佛樓尋山無勝侶獨自掉  
歸舟

溪漲

溪漲全吞地雲低不斷天環山惟有水老屋忽如  
船永夜巢危閣私心戀薄田蛟鼉狂太甚伐取令  
徒傳

寄雲起

時雲起以錢  
五萬助僧

十萬銅錢贖捨身賣兒貼婦笑梁陳應畱長者鋪

園物給與千家待哺民若輩晏安誠大蠹吾儕辛  
苦且長貧外間不識揮金性道是何充佞佛真  
平生我亦笑兒曹障籠持籌拙更勞若與柴門漆  
筍饌且爲寒士贈綈袍百金便是中人產一擲何  
殊六博豪從此巖關登眺處杖頭無物買松醪

聞庭瑞院試冠軍

碧海珊瑚鐵網寬會須射策上長安雄文偶爾爲  
雞首小趣差如食蠟肝書裏江城雙屐遍年來山  
寺一燈寒毛生有穎終能脫誰道平原相士難

夜起

溽暑鬱牀席流汗浹肩背中宵起披衣悠然時展  
牀承流立我前高與湖山配殘月吐其巔奔雲漚  
其內清風池上來竹露光破碎夜氣滌塵燠道心  
清呈礪杳無雞犬驚獨此形影對是時醉夢中顛  
倒凡幾輩

晚過賞溪

城下青溪溪上山齋鐘盡日老僧閒亭臺三百南  
朝寺留得風光在此間

夏秋之交矮屋熱甚欲作小詩以消長日而  
苦無佳題偶讀文丞相正氣歌取其詩中

所引古人各爲一首

六國何人解報仇一椎勝是萬貔貅英雄憤氣甘  
荆聶博浪先聲啓項劉狙擊若教秦政斃功成早  
與赤松遊分封最憾韓王死垓下從參帷幄籌

張良椎

牧羝窮海朔風嚴奉使單車久滯淹雪窖終能生  
馬角茂陵不及挽龍髯故人書札丁年歎西壁衣  
冠屬國瞻江左夷吾空有節一時調笑莫相嫌

蘇武節

誰遣風雲假豫州窮山放虎抱深愁招來卿等真

無狀老去將軍是斷頭不薄左車成主客終羞孝  
直快恩仇一言能壯西川色怪底英雄意氣投

嚴將軍頭

蕩陰敗績如繻葛司馬中哀賦式微天子臨戎寧  
得已侍中濺血獨如歸亂來帝頗親飛矢死後臣  
心尚戀衣亦有墓門悲泣者道分忠孝豈相非

嵇侍中血

慷慨軍前橫笛音裏瘡嚼齒戰城陰男兒有骨剛  
先折天道無知憤獨深拔劍可憐南八指擁師不  
解賀蘭心中丞傳後韓公序便是鬚髯亦古今

張睢陽齒

大河以北少堅城祇有真卿與杲卿天子聞名會  
未識常山罵賊已無生不辭鬼錄全家節所惜蜂  
屯八日兵此舌風霜存萬古廣長豈屑比溪聲

顏常山舌

皂帽棲遲遼海濱中原無處着閒身天冠地履持  
終古壘上乾初見此人前輩風流思折角同時名  
士有綸巾平生獨乏簪纓慕垂老書稱草莽臣

遼東帽

長憶離宮顧命時老臣報國忤何辭隆中籌策三



分業劍外崎嶇六出師伊呂有書能悟主曹劉無  
骨漫誇詞可憐原上星先落兩表徒牽後代思

出師表

祖生才氣世無雙剪棘中州建棨幢功濟巨川思  
作楫志清戎馬誓臨江南冠空灑河山淚北伐誰  
瞻父母邦亦有先鞭劉越石扶風歌罷憾難降

渡江楫

何劉結士奈心愜獨有司農氣慨慷死後名聞天  
子悔生前義憤賊臣狂徵兵空自煩中使叩馬何  
曾召晉昌他日園陵傳露布笏痕猶可驗頭創

擊賊笏

病瘡

君子慎持身小人多濡首衛生旣失經抱疴誰歸咎  
雖非心腹疾已卧床席久暫行屢欬足欲動常掣肘  
剝膚實切災憂心如負垢乃知恫瘝身不應蒙莊口  
誰堪頤隱臍俄而臂生柳懸解固有時髮膚豈無受  
讀書懷古賢冰淵思所守

至古香齋

疾風捲殘籜頽陽淡疎林荒郊時一出始知秋氣  
深百年苦易逝二豎交相侵念往半憂樂撫時罷

登臨倚杖叩禪關。掃榻理寒衾。前峯下暝色，空庭  
連野陰。嗷嗷征雁鳴淒淒，候蟲吟適人無異趣。感  
物非一心，古人不可作。有酒誰共斟。

翟燕符遊江右不及送別賦此代簡

先生臨遠道，我病卧禪林。不及岐途餞，真傷舊雨  
心。依人悲斷梗，入夢隔遙岑。小扇留詩畫，憂來時  
一吟。

故人時憶李之子，且依劉下榻。逢賢主張帆，賦壯  
遊九江。浮遠勢五老，亘清秋。應有登臨咏，征鴻寄  
得不。

雲起書來索余所摹魯公爭坐位帖

歐虞善書冠李唐顏公繼起追鍾王七家楷法世  
所寶不知行草尤擅場鹿脯馬病及乞米爭坐一  
帖龍騰驤平原唱義能殺賊名聞天子心慙惶祿  
山希烈視如鼠禮數豈肯寬貂璫想公下筆忠氣  
奮紙上字跡俱軒昂惜其流傳一千載臨摩形具  
神則亡阿弟書學董文敏鵠鵠戲鴻書種堂明窓  
淨几時展玩得意研盡隄麝香折簡忽來索顏帖  
愛看筋骨秋鷹強我於此道立門外偶舉寸管指  
輒僵得公遺蹟慕公品爲摩一本還珍藏文章書

法雖小道根柢正氣流渾茫君不見蘇黃米蔡四  
家體千古黜京爭進襲

張坡文自巧嶺來謂雲起近服何首烏腹痛  
嘔洩時余亦服此而病作詩寄之

盡信書不如無書六經傳疑誠有諸醫方本草胡  
爲乎鹵莽自食何首烏我緣卧病爲醫誤寒熱交  
戰災切膚阿弟本無恙藥餌何所需食之謂可黑  
髭鬚豈知絞腸破腹如轆轤張子過我憫我兄弟  
愚破涕一笑聲胡盧作詩自戒兼戒爾衛生豈必  
求靈樞孤樹不使雙斧伐引年何用昌陽扶天下

無事莫自擾治以不治誠良圖君不見古來天子  
戮方士不死之藥終何如

次韻雲起仙人墮劍石

芙蓉劍插千仞壁三尺天然去妝飾陰陽爲炭造  
化爐人間歐冶鑄不得流電不煩鵬鵠拭堅金一  
任風雨蝕自古常傳荆聶徒仙人豈有睚眦隙故  
解錦條輕棄擲聳身雲霞便遐陟藤纏土埋千年  
化爲石樵夫見之苦不識但覺山深月冷暮烟黑  
一嘯林間鬼魅俱歛跡阿弟探奇不厭勞歛見神  
物出巖腹

叶

歸來吟作石劍詩劍氣墨光交奕奕

題封遠寄古香齋欲令懦夫赫然增起色我今俠  
氣老已除便得干將莫邪亦何益但恐此詩此石  
光氣日騰上仙人俯視生太息勅令六丁下取將  
空山白日飛霹靂

自題小畫

人在山中住山在胸中橫有時森欲出寫向剡溪  
藤烟雲杳謁間數點何青青扶杖指九疑揚帆入  
洞庭平生所未歷意匠聊自營縱復不相似亦足  
陶幽情何須與董巨千古爭名稱

次韻金陵懷古

龍虎鍾山拱石城東南半壁竟何成烟花不解前  
朝憾洛蜀猶留舊黨爭浪說五王浮馬渡空嗟十  
廟失雞鳴當年轉戰收形勝無復金人戀漢京  
金甌不是舊山河林鳥猶聞喚奈何夾座箋呈江  
僕射當筵樂奏鏡新磨建牙淮水先陳款奉使長  
安尚議和妄意永嘉南渡事笑啼都在夢中過  
金陵原是小朝廷叔寶君臣醉未醒但有美人歌  
玉樹更無名士泣新亭長江天塹飛輕騎百戰燕  
城隕大星日暮宮車何處去可憐流矢着丁寧  
蟲沙猿鶴使人愁佇看紛奔出石頭內晏未終拋



社稷同儕相怨擁戈矛繁華舊事烏衣巷寂寞寒  
湖桃葉洲漢關唐陵禾黍盡千年王氣至今收

次韻方正學祠

荒祠遺像肅崢嶸一字難逃十族輕豈謂讀書留  
種子翻令草詔屬先生龍髯攀落秦灰黑鵲血啼  
殘墓草橫堪歎齊黃同鼠竄悔從帷幄共談兵

次韻登報恩寺塔

靖難雄風安在哉空留一塔使人哀最高欄楯天  
中出不盡興亡眼底來飲馬遙窺仄步鎮談經近  
俯雨花臺山川聊供登臨興萬里烟雲極望開

次韻登雨花臺

何意臺城餓頓教花雨收始知千佛偈不異一塵  
浮地據南朝勝山牽北顧愁荒亭堪駐馬懷古海  
天秋

挽雲石和尚

雲公世尊宿獨卧雲門雲丈室榻曾借一樓鐘共  
聞傷心老病迫轉眼去來分欲訪貝多樹前山空  
夕曛

一粒藏大界百年如隙駒誰能戀所有不復返諸  
無罷講收花雨空堂竄野狐澤公猶健否真性豈

迷途

題無名氏畫冊

妙畫通神直至此收將萬里入尺咫依稀置我邱  
壑裏山卽真山水真水遠山蒼蒼插天峙遠水鱗  
鱗吹浪起山如砥柱障水回水如衣帶界山止山  
中石橋有路通水面輕舟當岸艤山回水複無終  
窮七澤九嶷迷遠邇幾家茅屋有漁村一帶薜蘿  
隱山鬼不逢蘭蕙詠騷人定有雞黍享高士吁嗟  
平輩巨荆關稱絕技淋漓元氣俱已矣邇來作者  
徒自喜此幅不題誰氏子披麻皴自北苑來無枝

樹與雲林擬筆端奄有宋元美石谷老人無乃是  
我今卧疴束經史烟雲供養貪不死惜無五岳起  
寸衷安有烟波翻十指棄家當與尚平遊歸來一  
潑蔡侯紙披圖朗咏杜陵詩青鞋布襪從此始

次韻盛春谷詠古四首

館娃宮裏碧梧秋劍氣消沉隱虎邱誰識夜來歌  
舞罷越承恩處越添愁西子

馬上琵琶怨別離冢邊青草繫相思六宮粉黛何  
曾見空使君王殺畫師昭君

飛來燕燕啄王孫火德衰時水不存祇有篋中紈

扇在秋風雖冷是君恩 飛燕

誰令鼙鼓動漁洋宛轉娥眉古佛堂畢竟馬嵬唐  
土地千秋過客憶三郎 玉環

晚過石佛寺

落日獨行吟沿溪還入林言尋石佛寺遙見南山  
岑木葉失樵徑霜鐘清道心偶然聞梵唱杳杳暮  
烟深

冬夜大風偶作

朔風動地來枯林自磨颺颯然鳴窓紙恍如飛雨  
點中人欺酒力繞壁逼燈欲勢催孤月低力破凍

雲歛入冬久苦晴隔歲預防歉中夜轉銅烏虛牀  
回夢魘應遣水花飛一壓麥苗剡開門望遠天明  
星燦崖广

觀漁

風吹白日下高岸赤脚踏氷血流軒竹竿綳綳高  
尺半信手一擊水花濺泥沙浙瀝枯葦亂眼昏不  
見魚蝦竄古者庶物蕃有經時舍其孕登其成人  
窮乃覺物命輕鯢鱖亦供刀俎腥嗟爾操網入寒  
汀燦燦水底明疎星

解館日席間作

悲張弓  
于先生

年年雞黍約比鄰綠蟻尊垂白髮新舌底曾經三  
載未眼前另換一番人古香吹散書留額古香齋  
額先君  
所書楚些吟成淚滿巾他日如爲先友記却緣交密  
倍傷神

池邊

半畝池邊立晚晴夕陽催落暮鐘聲畏寒小鳥歸  
飛盡一隻鷺鷥烟外明

新春至古香齋作

與世殊臭味耦俱惟詩書豈敢誇百城聊此耽幽  
廬昔別自歲暮今來值春初枯林歷冰雪細草生

階除乘暖易爲茁凝陰難遽舒同仁本一視託根  
有萬殊靜觀剝復理悠然得真吾

送雲起之太邑

饑驅爾我常遠遊臨岐握手生離愁翻憶平生在  
家日此樂一失難追求登高望盡行子跡三十六  
峯壓天碧仙源山色冠江南裹糧持策曾窮探

雲起

于前歲會  
遊黃山

今往讀書山之麓時見黃山真面目開

軒招得故人來應能破寂揮霞杯嗟余老矣不稱  
意避人寄跡南郊寺抱寺層巒如玦環但多平遠  
無奇勢安得遊戲行烟空騎龍直上天都峯丹臺



或與軒轅逢遊蹤待到秋來好煩爾山前作東道  
隔溪望水西桃花

十里桃花西水西年來風景阻輪蹄未消舊恨經  
三月直引春心過小溪抱郭殘山雲錦亂隔林茅  
屋酒旗低無緣得逐劉郎去望裏紛紛紅雨迷  
賞溪橋外綠楊遮缺處欣逢樹樹花老眼真成三  
里霧東風不散一川霞魂招倩女空留影路入仙  
源舊泛槎未忍別他頻駐馬擬沽春酒醉春華

題友人扁舟江上圖

平生慕髯蘇赤壁放蘭橈我友亦其倫披圖契幽

好奇探造物藏理愜智者樂岸仄夾叢篁潮平燦  
落照空明蕩人心遠碧混天貌中流任所適抱膝  
發清嘯斯人豈散人遺世自高蹈跡託張子舟意  
切任公釣得魚衆心厭吹息二蟲笑經世志其大  
陋彼坳堂膠

肖巖詩鈔卷五終

肖巖詩鈔

卷五

肖巖詩鈔卷六

涇上趙良霽肅徵甫著

暮春言志

春寒掩重扉日高戀孤衾徐起步簷下一鳥鳴前  
林習習扇微風交交傳好音以彼求友意觸我傷  
春心園卉歛舊艷溪烟布新陰四序更推斂百物  
誰能禁去矣跡成往來者思自今達人撫元化興  
發川上吟

借榻絕人境古屋鄰荒邱高軒不肯顧木石相與  
儔如何二三子乃肯從我遊晨興課章句夜寐親

肖巖詩鈔

卷六

孔周際此春景暮  
耽彼林泉幽  
鳩拂見  
乘沃雉鳴  
知麥秋農人始東作  
荷鋤出田疇  
嗟余徒坐食得  
免大蠹不

大雨

四山低處一聲雷  
颯颯簷前驟雨來  
隔嶺尚懸西  
日脚翻空疾捲黑  
雲堆武安屋瓦  
兵初振鉅野河  
堤浪忽摧豈意麥秋逢  
此厄饑腸牛吼劇堪哀

古柏歎

雷公鞭起老蛟怒  
倒捲長川雨飛注  
折木發屋挾  
風威壞我庭前古柏樹  
此樹閱世幾何年  
深蟠厚

地高參天重陰下覆清池圓有似童童車蓋然我  
昔挾書隨杖履借榻維摩方丈裏每盼庭柯怡老  
顏秋階桂樹花斑斑桂辛柏勁交二美顏以古香  
跋其尾古香齋先大人所書額也額後有跋至今彈指十星霜擎竊  
大字懸空堂哲人其萎梁木壞柏也憔悴非故態  
亦如歲運厄龍蛇豈有人心忍剪拜高枝摧拉低  
枝存疾風猶撼青銅根我來默誦蓼莪句垂胸血  
點兼淚痕寄語土人且珍重造物終當惜梁棟貞  
心不死回長春他日猶能宿鸞鳳

以畫扇贈懶雲

懶雲教我詩微旨  
唐三昧我從詩悟  
畫得味酸鹹  
外禿筆寫枯枝遠  
神無近態請君從  
卧遊溪山發  
清籟

贈石山院長黃藝洙

新安人

相國文章壓上台  
從遊都作棟梁才  
至今勝地雲

龍在

石山書院卽前明許文穆公雲龍書屋

重見風流叔度來  
循吏

尊師懸短榻  
諸生環講蔭  
清槐此身擬向臯  
比侍  
愧我談經雪鬢催

立秋日作

昨夜微風掠髮絲  
朝來秋意上桐枝  
無由驗取膏

山杵祗有人間病骨知

呈蔡百川明府四十韻

漢代推循吏 清時見古人 無私懸玉鏡 有脚布  
陽春澤已傳 鄉校名宜勒 翠珉鴻猷知 特達小試  
異沉淪 憶昔遊京邸 逢君作國賓 禹門慚點額 雲  
路羨翔麟 姓字高題塔 文章實致身 學承朱子正  
謂令師朱策比董生醇 應入深嚴地 常爲侍從臣  
竹均先生

帝心思法古 治道在厯民 偶屈青錢選 旋膺墨  
綬新 一麾辭絳闕 三異達 楓宸褒德封 奚遠旌  
庸試 轉頻仙鳬臨 晉水霖雨到 江津慈父來 何晚

吾儕樂有因讀書懷召杜紀績遇荀陳未礙貪泉  
酌寧嫌破甑塵琴調官閣月草綠訟庭茵好協星  
俱遍災偏旱荐臻五行多沴戾萬戶共酸辛用請  
神倉粟而宏 聖主仁飛書通憲府入告沛 恩  
綸惠洽啼號免租捐雨露勻哀多能益寡安富勸  
周貧才豈饑年損祥占異雀馴從來千里足自遇  
九方歎大吏思登薦 皇期待秉鈞台衡終相霸  
下邑暫留恂布政時多暇揮毫定入神題詩增勝  
槩載酒趣芳晨古跡長春剌桃花西水濱清遊情  
未減名宦道殊倫山斗勤瞻仰愚蒙託拊循躋堂



誠惓惓投刺久踈踈下士施先及登龍志一申何  
曾私接納祇是廣陶甄藥裹收猶子謂姪哀詞及  
老親門庭枉轍跡光采燦蓬榛厚德慚難報微吟  
感獨真口碑諸五字不與石同湮

蟬蛻

脫盡塵埃得此生淡烟高樹碧無情心虛已解飛  
鳴累羽化原從洗伐成尚憶閒愁牽楚客寧聞北  
鄙到琴聲塔焉隱几吾何耦一任寒蛩感不平

蠹蛻

鳳子輕盈絕可憐却從解脫得翩翩寧知脉望書

中字差比唐宮篋內錢抱葉曾經三日卧宿花如  
遇再生緣人間大蠹誰能蛻夢裏莊周自惘然

秋海棠

苔階一簇映簾櫳冉冉柔枝淡淡紅應爲玉環驕  
太甚讓他獨自占春風

題鍾馗夜遊圖

明皇晝夢鍾進士手擘口啖二豎子詔謂吳生寫  
作圖磔鬚卷髮形容龕寫人則難寫鬼易窮神極  
態實兒戲鍾君身騎烏犢牛張燈擊鼓夜出遊或  
呵其前殿其後儀衛盛比公與侯一物一鬼各一

狀牛首蛇身屹相向車中有女獨嬋娟歛從鬼國  
逢天仙蚩兄妍妹何異態柳下盜跖將母然昔者  
吳道子畫壁景雲寺地獄諸變相一一竊其致世  
間怪事安可知心思所到容有之象姦九鼎神禹  
鑄載鬼一車公繫辭我觀此圖三歎息山精木魅  
如相逼白日公然來攫人嗚呼鍾君聞不聞

廷瑞晨過古香齋卽從至石佛寺

朝日散巖霏涼風靜庭樹剝啄聞扣門良友快清  
晤劇談未盡情攜手復同步聽水尋暗壑披蘿豁  
迷路喬林葉微脫遠天峯可數凝睇倚蒼松谷口

微鐘度

斷橋支古槎疎林見茅屋故人此借榻向來幽興  
熟逕積敗葉黃簷垂橘實錄徐出篋中文攜向庭  
下讀賞心不知疲晚雲已迷麓出門尋舊蹊撲面  
飛蝙蝠

種菜

穫稻既畢水雲平老農飯牛朝出耕東家種麥西  
家菜初冬一雨都抽青豐年不饑亦不饑青鹽錦  
帶調作羹霜風捲地衆草死白菰晚茁如蕪菁芥  
藍有孫腹有子秋蘇露茹難悉名土膏含味無不

足擷來共作杯盤傾愧我無能生計拙呼童種菜  
成一稜灌畦自抱漢陰甕旅食竊羞婁護鯖君不  
見東坡晚作嶺南行終年厭餐風露清熊蹯雞跖  
同一飽底須十萬如何曾

贈鄧石如

犀象不如花乳堅私印法自山農傳稷下里石越  
青田巧匠琢成方與圓欲摩繆篆文屈纏朱白體  
各區中邊指僵目瞪用力艱陽冰四法誰求全鄧  
君奏刀何砉然如遊鳥道開青天心精氣猛石幾  
穿鐵筆碎玉霏紫烟上及秦漢下宋元齊赴腕底

勤精研今春過訪南山巔尊彝古鼎羅滿筵爲我  
刻印摹前賢要令賤名珍琅玕空齋晝靜風雨殘  
筆聲軋軋鏗林巒神奇變動紛無端以意點石石  
不頑苦心欲語知者難但見丹砂落紙紅爛斑揖  
我遠遊黃白間石如自涇遊新安歷夏及秋行復還塵途  
困頓囊無錢剩有笈遊詩數篇笈遊草石俗工得如詩集也  
志爭誇妍古來才大遭迤邐君不見補蘿外史終  
卑官造物不肯容剗鐫

朱順百客漢江得古琴歸貯聽松樓上作琴  
操來索余詩乃歌以贈之

嗚呼當世無蔡邕誰從爨下知枯桐大雅元音不  
復作琵琶箏笛聲亂聰朱君好古通律呂不放瓦  
缶參洪鐘黃鶴樓前漢江口千年古器埋羣蒙客  
途相遇勤拂拭斷紋斑剝苔花濃組以桑絲徽以  
玉快如烈士買得三尺青芙蓉攜琴歸故里坐卧  
常相從高樓對明月虛壁生微風緝絃綴羽一再  
鼓杳然鶴唳秋天空香殘爐冷心寂歷奔濤捲地  
翻長松喁于衆籟聽不辨何異海水汨沒羣鳥悲  
號萬木叢妙曲已無廣陵散人間何處蓬萊宮他  
年訪君此樓中爲我撫操神融融琴耶松耶聊適

意一任鍾期死後皆耳聾

假館大幕山

夙性少推移對人常局促欲與強周旋曷若返幽  
獨出郭訪招提飛甍聳林木結構循地勢曲折附  
山麓稍喜市囂遠遂寄佛龕宿雲腴石上烹古編  
林下讀緬惟開士居曾邀幽人躋謂詩僧踏翠山  
萬重泛月溪九曲勝地牽昔懷遺詩愴今日澤公  
不復來草徑寒烟綠

哀書常兄

幕溪曾下讀書帷誌地編成一卷詩兄有幕溪誌地詩一卷



滿眼雲山仍自在傷心琴劍竟安之園中草木坡  
公記夢裏池塘謝客詞此日禪房分半榻粥魚茶  
板總堪悲

芭蕉

片葉新抽出短牆濃陰漸展覆深堂愁心似我驚  
秋雨老眼煩君蔽夕陽預擬羲皇通午夢漫教沈  
約託彈章平生知己王摩詰寫向寒林得傲霜

九里嶺

磴道盤空上層嵐極望開人耕飛鳥外寺鑿亂雲  
堆陰壑松杉合晴天風雨來危途苦登陟僕馬久

徘徊

磨箭石

高嶺矗天雲氣黑行人魚貫苦登陟中有大石號  
磨箭箭痕不爲苔蘚蝕或云風雨當秋夕燐火如  
螢飛絕壁不見箭鋒相直處但聞磨箭聲啾唧此  
地得非古戰場殺人血染土花碧怨氣千年消不  
得生爲國殤死爲厲射人亦似含沙蜮不則陰崖  
窟谷少居人山精木魅羣棲息此輩從來反覆心  
喜則相親怒相敵霜花迸落接短兵電聲閃爍飛  
鳴鏑甚者公然白日出狐兔驚惶竄荆棘我聞大

禹鑄鼎象神姦鬼怪不許遊人間何敢猖狂治弓  
箭日尋攻戰如兩蠻我欲仙人鞭石下東海不令  
遺跡留空山長途浩蕩任往還

丁溪冒雨歸

肩輿歸去太匆匆身在樊川七字中不信客腸行  
欲斷杏花吹落酒旗風

楊花

昨夜東風着意顛曉來飛絮小樓前歌殘蹋足空  
成夢看到粘泥始悟禪芳草堤邊隨去馬夕陽亭  
下聽啼鵲無因更向長條戀留觀餘花媚遠天

晚眺

獨處寡歡悰出門展清眺綠徑每孤往得意遂深造涉澗屢回沿穿林迷窈窕杳杳失孤村蒼蒼見羣峭東嶺擁歸雲西崖燦餘照微尚託邱壑棲遲雜耕釣永與人境疎靜得觀物妙緬彼栗里人高懷許同調

示諸友

人患在爲師此言實良藥所苦爲饑驅舌耕心自忤昔者魯仲尼亦或師襄橐他山石雖龕可爲良玉錯我老無能爲學不植而落諸君力正強先鞭

盡一着愧乏博喻方請出片言約古之學道術躬  
厚責人薄母遂已之非母攻人之惡母用盛氣凌  
母以笑言謔母見存小利母志欺然諾母懷盈滿  
心母恣逸遊樂貌從母心違實勝母名託凡此瑣  
屑言聞者應嘲噓所以必諄諄立身防失脚我輩  
業詩書少不識耕作晏然爲大蟲轉瞬比微燭二  
曜如跳丸長繩豈能縛父兄望有成老大悔如昨  
吾言不樂聞無事從躡屨

讀張王樂府喜其辭意新警擬作四章

古釵歎

長睂高髻隨時好古妝少見人多笑寶釵墜井幾  
何年光氣隱隱騰寒泉早知於世無所用底須羅  
列妝臺前東家小女年十五拂拭鳳儀垂兩股用  
將承鬢與搔頭對鏡空羞好睂嫵君不見漢宮欲  
碎仙人釵化爲白燕飛天涯

北邙行

孟嘗淚落雍門彈山邱零落誠悲酸醉裏驅車北  
邙道螢火青燐飛碧草崇碑銅泉亦何爲牧豎螻  
蟻誰自保不問東陵與首陽死名死利同蒿邱請  
君聞此莫慘傷死者樂逾南面王白楊蕭蕭天欲

雨卧枕欄牖與鬼語

短歌行

日東出水東流來者短去者遒春風花開秋葉愁  
昨日少年今白頭欲入蓬萊採靈藥三山縹緲風  
濤惡欲纏十萬上揚州碌碌爲人作馬牛有錢且  
買盈觴酒清夜張燈召賓友考鐘擊鼓樂及時酌  
君大斗使君壽短歌行請君聽

鏡聽詞

明鏡照顏兼照腹腹中有事鏡能卜空房無人照  
獨宿拜向鏡前再三瀆不願鏡爲火齊鏡鏡外人

語鏡中應但願人能如鏡圓千里言旋憑鏡聽聽  
得人人都道來摩挲鏡面安鏡臺寶鏡有靈私自  
幸好言無應還相猜一時悲喜腸千變鏡裏難逢  
可中面年年攜立街頭月聽到紅顏生白髮

### 七夕

河漢無聲夜漏沉冰盤瓜果布庭陰人間未信金  
梭落天上曾聞繡幄臨青鳥書傳瑤島遠赤龍仙  
去碧城深雲霄會有相逢日祇在靈犀一點心

### 夜聞秋風

拂地風來逼玉釭悲秋慘澹氣先降聲隨萬馬橫



榆塞勢捲奔濤赴曲江倦客登樓懷鶚隼美人入  
夜怨蘭茝楓林蕉葉常疑雨不覺前山月滿窓

迎雁步韻

秋高紫塞怯霜威好向江南振羽飛挈伴不從雞  
鷺亂來賓猶及稻粱肥蒼葭隔水寒雲重曉角當  
城落月微我有天涯兄弟在尺書未到竟何依

贖裘步韻

怕見蒙茸舊帶寬經秋無奈葛衣單熟知貂比蘇  
君敝免受人憐范叔寒子母權來傾旅橐雪霜侵  
處勝齊紈任他狐白稱輕煖了烏何嫌共歲闌

重陽後四日忽得蕉花

手植綠蕉高比牆攢莖抽葉如旗槍自春徂夏紛  
披猶不放羲馭來深堂我時病渴值恒暘舉杯欲  
飲三危漿恨無花開露瀼瀼綠天但可招晚涼彈  
指節序過重陽冷風疎雨生迴廊老幹忽作雞首  
昂幹末蓉萼森開張千葉百子各一房沆瀣積氣  
留中央豈如釀蜜勞採芳亦非和乳誇煉糖灌心  
入頂甘而香天帝賜與仙人嘗我欲爲爾問彼蒼  
醴泉甘露人間祥胡不早慰引領望遲之又久凌  
青霜不與桃李爭春光獨教晚實隨松篁怪底詩

人引興長寫向雪裏非荒唐

落葉詩三首

秋氣肅天地老樹心先知飄然一葉下宛轉從風  
飛亦既離本根焉知何所之勞人起中夜皓月流  
堦墀衆響忽爭作疎影久參差搖落從此始感歎  
不自持

商飈捲地起衆葉隨飛揚二月吹葉綠八月吹葉  
黃榮華不自主顛悴寧及防颯然作飛雨急點侵  
頽墻空堂午夢回疎林透斜陽山中少人跡門逕  
從荒涼

方春惜落花花落綠陰深及茲感落葉葉落枯枝  
森亦或存一二未足藏棲禽殘星闌無色逝水波  
載駸榮悴物之理造化會何心緬彼後凋者落落  
蟠遙岑

記所見聞

秋盡冬來寒氣肅震雷收聲魚龍伏山川寥寂一  
登臨雲淨天高飛落木忽然捲地颭風來山頭吹  
起雲成堆黑雲爛爍金鱗開飛雪驟從頭上至長  
林拔向空中摧有如鉅鹿觀楚戰人人惴恐顏色  
變我亦抱頭如鼠竄歸來咄咄自書空不知災異

何由見邑西千山萬山高山根潭窟藏神蛟居人  
每以漁爲業撇波舉網乘輕舫一朝貪利心薰熾  
投以毒藥水如沸潭中驚起二龍子舟沉水立漁  
人死暴殄天物干天誅可憐遺禍延無辜折木發  
屋爭號呼古今怪變何時絕此事傳從樵者說書  
之用自警饗餐

題陳章侯美人圖

下界不合逢天仙怪來獨立無人憐含情凝盼翠  
袖偏誰其作者題老蓮老蓮四歲工潑墨筆法天  
授非人力偷寫翁家雪色壁童子號咷翁歎息亂

離身世多苦辛縱酒狎妓遭人嗔時將圖西英雄  
手下筆爲傳兒女神美人自惜紅顏好不許函師  
留腹藁誰從長信見閒愁寫出玉階立秋草秋來  
黃葉飛滿林見葉傷秋不自禁可憐名士落拓意  
盡寄美人遲暮心當時好手誰能比南陳北崔號  
雙美崔生餓死土室中陳侯混跡浮屠裏二子高  
節不可攀時有函筆畱人間卽看此幅亦奇絕想  
見多愁胡淨鬢

觀蔡京黨碑拓本

宋四家書傳千春京也不隨蘇黃羣魏鍾晉王唐

平原京能下筆與之親其人既醜物不珍後世寂  
寂名無聞此碑字跡今猶新見者髮指生怒噴有  
宋建國弱而仁北遼西夏相爲隣所恃朝宁多純  
臣協恭能令天子尊自從安石學誤神繼以二蔡  
兼二惇倒置是非生黨論大書刻石端禮門司馬  
以下三百人罪及妻孥錮子孫膺滂田寶無一存  
羣奸狐媚誇盤根如犬吠日聲信信石工僅免鐫  
安民一朝輦鼓生邊塵禽奔鼠竄何紛紜遂從吳  
越望燕雲冰天雪窖畱羈魂追原禍亂生有因儋  
州貶死猶濫恩君不見漢家黨錮生黃巾清流白

馬遭朱溫南渡以後棲海濱僞學之禁猶重申千  
古覆轍時相循未若京也肆然畱碑文石雖可毀  
名不泯附名翻足榮後昆小人妄自區蘊薰詎知  
誤國還及身此本不須秦火焚來者請得鑒道君

次韻金陵襍詠

臨江雉堞自回縈佳麗南都配漢京燕舞鶯歌迷  
日夜雲愁雨淚變陰晴埋金不壓千年王鎖鐵空  
嗟六代更從古石頭誇虎踞誰知飛蓋洛陽城

金陵城

早向秦淮詠玉鉤年來夢繞水邊樓柳絲牽憾偏



宜雨桃葉迎人不肯秋酒爲當歌容酩酊鄉能送  
老戀溫柔清溪長板橋頭路一夜烏啼古帝州

秦淮曲

人聲沸地市烟稠無復朱門夾道樓一代功勛誰  
甲第兩家子弟舊風流談餘玉塵塵生柄舞冷珠  
簾月上鈎不及尋常茅屋在年年花鳥媚春秋

烏衣巷

南國妖姬最可憐青溪相映綺羅鮮詩傳樂府情  
何極渡有芳名地不偏花憶紅顏春過雨山靑翠  
黛月低弦永和人物風流盡玉笛誰邀古埠邊

桃葉渡

蕭公事業剩荒臺扶杖登臨夕照開  
三楚風烟通指顧六朝陵谷重低徊  
當時花雨談何劇此日金錢贖不回  
聞道宋家遺骨在冬青杜宇總堪哀

雨花臺

二水三山極望中高臺千載屬詩翁  
徒傳鳳瑞巢阿閣太息吾衰託古風  
故國多情芳草綠長安翹首夕陽紅  
江頭過客頻登眺下筆誰爲文陣雄

鳳皇臺

樂遊苑北接昆明夾岸秋風莽棘荆  
武帝旌旗千

艦集竟陵書籍五車盈曾催玉漏中宵箭無限金  
甌故國情不是湖山能作崇佛奴妄自厭臨平

元武湖

淮泗真人起草萊雞鳴十廟聳亭臺不堪小劫龍  
孫去又聽新歌燕子來蕭瑟白門烟外柳飄零淮  
水笛中梅祇今紺宇凌霄出無復麒麟閣上才

• 雞鳴山

過田家作

亂山如玦環田園自繡錯居人兩三家結廬面雲  
嶠茅簷鳴朔風草逕捲殘蘗短褐常苦寒炙背坐

籬脚客來載笑言有酒互斟酌歲晚畢衆務田器  
挂高閣偷閒且盡歡轉瞬待東作步履過隣里雞  
犬散墟落幸逢天氣佳而無雨雪惡含花來歲豐  
挾纊眼前樂老農心計短不及麥秋薄但須輸官  
租裹足遠城郭

爲崔琬以曾祖南極翁題密崖圖

密崖當碗歛之要衝崖前一道鬱屈如蠶叢鳥飛  
猱升弗可以徑度何況樵童賈豎行李負擔往來  
于其中仰視巉巖出霄漢俯臨絕壑飛清淥失勢  
一落幾千丈下爲魚鼈上飼豺與狐吁嗟遊子途

終窮驅山走海焚林烈澤異人異術難再得誰能  
一手一足成神功乃今幸遇南極翁翁居密崖麓  
偶行崖中駭膽而怵目歸來歎息累日夜欲遣神  
丁破崖腹捐貲鳩衆工選日僭舂搗攻木殺草鑿  
石開道一炬蕩然變陵谷閱月踰歲事告成行人  
履險如履平昔日援藤捫葛苦登陟今也肩輿扶  
杖自在游行晚人歛人戴公德此崖不湮名不泐  
豈知翁以濟物爲心平生種種善事行于陰行年  
九十不倦勤此事未足盡爲人卽看畫圖張子作  
豈爲翁也播厥聲要使世世子孫無忘其所式型

崔琥以惠芮棗鹿脯詩以謝之

黃鶴題詩獨擅聲更無健筆敢爭衡望君直隔蓬

萊閣

閣在黃山

惠我偏多縞紵情妄聽如瓜誇羽客何

曾作札費真卿他年載酒遙相訪雲海天都許共  
行

北遊

撲面風來不道寒敝裘衝雪上長安戀他書味同  
雞肋笑我名場逐鼠肝畢竟桑蓬先飯食可能泉  
石獨盤桓從來 聖世無肥遯老去雄心尚據鞍

四褐山阻風因遊山中古寺

風帆片片落輕鷗四褐山前阻石尤茅屋數家成  
野市危峯一徑折江流舟同仙侶乘清興謂崔杖  
屨以杖  
拄禪房悔遠遊回首故園何處是烟波無盡際天  
浮

### 望金山

海東日射江天赤突兀江心一拳石有如美人臨  
鏡臺又如海市成蓬萊我行屢過此山下風利走  
船如走馬每牽俗累阻躋攀未得山僧共閒寫好  
山何日無人遊坡公玉帶今尚畱大江從古幾爭  
戰斬王勇氣今猶見能文善武人中豪山川藉爾

增名高古今相望不相及蒼茫日暮沙頭立

遊平山堂

層岡勢逶迤危堂氣崢嶸獨立最高處俯視窮江城開軒面遠天積氣連滄溟慘澹暮烟紫窈窕羣峯青北固橫鐵甕鍾阜屯金陵遙從南岸列都與斯堂平緬惟六一叟載酒頻攀登吟詩萃豪翰折花助傳停我來何太晚斯人去千齡驚飈振沙礫積雪淒林坳豈惟雷塘路能傷懷古情

園林

水邊亭子竹邊樓兩岸名園一日遊祇當讀書觀



大意每逢佳處畧遲留

疏泉累石置亭臺欲奪天工不計財  
閉戶四時花鳥換主人曾見幾回來

旅店除夕

殘歲從宵去他鄉作客來  
車輪愁自轉馬齒苦相催  
春憶燕山雪花知南國  
梅阿咸能慰我談笑盡餘杯

六姪雷生頗能飲酒  
商藉以慰寂寞也

過邳州

不見江南南岸山  
敝車羸馬軟塵間  
忽逢翠抱東徐郭  
直遣光清北客顏  
樓憶元龍天咫尺  
圯畱長

利水潺湲英風太息斯人去蕭瑟寒林夕照殷

過蕭望之故里

長倩通經重石渠青宮無慧竟何如自持直道甘  
三黜所惜抽身遜二疏宦豎寧能殺賢傅漢家從  
此縱刑餘殘碑尚記蘭陵里差勝當年許史閭

過荀卿墓

蘭陵有賢令論學亦吾師抔土至今在憑車應式  
之垂名能附孟受業苦逢斯欲借焚坑罪終非平  
允辭

過王良故里

王良肯就徵將爲得人賀遇君如光武豈宜終軼  
軻伯況不稱臣子陵徒伴卧以彼高尚志終爲賢  
智過第恐處士聲未必王者佐嘉謀告旣無好爵  
縻則奈徒稱恭儉德詎最州郡課以此慙友朋不  
復馳堀堞聖哲慎行藏志士忍寒餓慎無假捷徑  
致爲山林斃

謁孟子廟

尼山旣已沒何可無孟子正道淪戰國橫議生處  
士邪說幟各張功利波從靡縱與述唐虞誰能辨  
臧否遭時有隱憂好辨豈能已直提乍見心與擴

穿窬耻至言豁愚迷聞者雜悲喜奈何後世儒猶  
復生詆訾王充刺何辭溫公疑尚爾伊余困塵途  
未敢忘仰止式瞻廟貌宏遙對嶧山紫雲護階上  
柏雷轟井中水卽此見天心眷注如關里欲去戀  
庭陰低徊忘迅晷

夜行遇風飲酒而未足禦寒也戲爲此詩

惡酒如惡人東坡誠善謔惡各視其才相遇有強  
弱我行東北道徒御中夜作狂飈捲地來飛石向  
人落鬚磔凍凝霜齒圖病成謔刺骨劇刀箭破體  
失狐貉旁人勸我飲馬上遞斟酌平生不舉杯畏

爲腐腸藥此日不禁寒轉嫌魯酒薄飛廉勢跋扈  
鞠生氣蕭索須臾皎日升暖意回林壑冰山勢欲  
傾挾纈人同樂始知陽德臨永解羣陰惡

過東方朔故里

柱下爲工首陽拙大隱不須託巖穴全身避世金  
馬門是直談笑爲詭論先生事君忠能犯批鱗將  
鬚如汲黯曲學不肯爲公孫何況倡優郭舍人鄙  
哉褚生見何淺乃謂將死言也善世人不識行誼  
高管窺蠡測徒嘈嘈蓬萊無益忠言在尚謂先生  
偷玉桃

道上口占

朝向青齊暮向燕長途辛苦據鞍眠幾多殘夢雞  
聲裏豈有清詩馬糞邊漠漠黃塵迷古戍荒荒白  
日下寒天遙思南國春風好綠到池塘草似烟

過河間

金帛求書急表章先秦古籍未終亡淮南內外篇  
俱在何似河間有獻王

求得遺經獻武皇欲調金石正宮商可憐郊廟歌  
天馬雅樂何曾肄太常

由莫州至雄縣泥濘難行有感而作

燕南趙北三日雪莫州城下行人絕東風吹雪融  
春泥我行艱苦摧輪蹄金沙嶺前下車走烟波遙  
望唐興口細流不擇成巨川碧淀古稱九十九涼  
馬臺臨易水湄昔人恃此爲藩籬時清不用瓦橋  
守但須規畫魚君陂旱則能瀦潦則瀉桑麻蔽川  
穀盈野官道蕩平能走馬過客不愁泥沒踝

過白溝河

石晉兒皇愧後周關南一戰版圖收如何用盡封  
椿庫尺寸無能踰白溝

過涿州

梯航爭向日邊趨  
凹字城爲四達衢  
地控上游臨萬國  
形成三輔拱皇都  
雄關古據岐溝險  
沃野人誇督亢圖  
從此長安知漸近  
西山佳氣望盤紆

琉璃河

琉璃河上彩虹橫  
錦石遊鱗徹底清  
照盡橋邊行子跡  
千尋聖水碧無情

過盧溝橋

僂指三千客路多  
馬蹄又到小黃河  
當空曉月依然在  
跨水垂虹幾度過  
天府欣瞻丹鳳闕  
舊堤欲訪白狼窩  
都城巨壘當南面  
日夜雷轟注海波



抵京寓居三藐菴

于市爭利朝爭名策士之說寧足憑名利得失自  
前定不如焚香默坐門常扃我遊四方寡徒侶落  
寞何殊行脚僧不投朱門投古刹粥魚茶版山堂  
清長安西隅地頗僻居人散處如明星誅茅結菴  
號三藐門巷寂無車馬聲有時微風起殿角不聞  
人語惟聞鈴中有老僧頗不俗兀坐夜讀楞嚴經  
與予舊訂方外契庚子年予曾寓此十年一見如三生拚  
除方丈設床席使我夢寐之內無牽縈長途勞頓  
得安寢不覺午日倒射僧窓明困眠饑食自足樂

曳裾投刺吾弗能  
鷦鷯但有一枝地  
仰天太笑圖南鵬

海子

黃泥亭子赤欄杆  
御座高臨碧海寬  
不爲太平存武備  
冰嬉寧肯耐嚴寒

望西苑

萬歲山臨綠水湄  
紅牆白塔望逶迤  
恩波近處春風早  
玉漏傳來曉日遲  
仙島花能承警蹕  
瀛臺晏每集龍夔  
自憐生不如黃鵠  
猶得飛從太液池

聚奎堂同鄉晏集

俱是同鄉共井人天涯相聚倍相親清談如聽南  
音奏禊事還脩上巳辰促坐移來花下席飛觴忘  
却客中身題名堂額多先達誰把文章躡後塵

遊愍忠寺

索處嗟寡懽出門怕懷刺步履隨遠鐘循途得蕭  
寺寶殿仰崔嵬丈室窺深邃異香襲氤氲僧徒萃  
三四坐立皆忘言戒定應生慧了無人我相寧有  
主賓意我聞貞觀時征遼曾失利招彼忠義魂關  
此功德地肇基偶布金踵事日增麗遂流金碧輝

交錯輪蹄至園囿號放生牲畜俱供飼仁風及異

物況乃民同類區區建閣心

寺本名愍忠閣

何如散征騎

曉聞汲井

井在三藐菴後

窓影沉沉庭樹曉春寒衾冷禪房悄誰從後院汲  
深清幾處牽回夢顛倒轆轤旋轉梧桐陰汲綆垂  
垂脩幾尋異水上水任來往一聲縈繞天涯心

院中雙槐

階前雙樹誰手栽高柯直上凌墻隈元陰密遮午  
曦淡盤枝互帶層雲頽我愛其樹會借榻兩足繞  
匝凡千回日照蛇龍影交錯風翻絲竹聲喧逐舊

聞此樹宜學市辟雍美蔭垂尊疊否亦三枝抽屋  
脊童童兆見廊廟材胡爲植近般若臺僧徒三四  
勤滋培得地嗟非爾公位託根幸免樵夫災闊別  
數年得重見摩挲生意何曾摧仰觀翠葉垂燦燦  
獨慚雪髯凝皚皚上番詩句尚畱壁後此歲月如  
浮埃君不見兔目鼠耳隨旬變春光轉眼逾恢台  
羈魂旅食吁可哀敝車促駕歸去來我心已如老  
禪寂槐宮之夢何有哉

贈崔琥以

承明著作屬伊誰賦就凌雲合遇時青眼高歌吾

老矣黃山秀色爾鍾之火珠堂上初求試鸚鵡洲  
前獨詠詩同向長安千里道敢將跛鼈逐權奇

肖巖詩鈔卷六終